

午

窗

隨

筆

午窗隨筆卷第三

濰縣郭夢星西垣撰

男祐煥之恭校

從孫恩孚參訂

閏正月十二月

閏以定時古人因氣盈朔虛之故置閏以齊之某年應閏某月自有一定之則乃由今以溯丑寅兩月之無閏已歷有年所或謂改歲之際諸多不便故稍爲變通而其實不然按明史景泰元年庚午閏正月正德十二年丁丑閏十二月嘉靖四年乙酉閏十二月十五年丙申閏十二月二十四年乙巳閏正月萬曆二年甲戌閏十二月其時蓋用大統術也及國朝康熙八年以舊法推閏當在十二月時憲書業已頒行

欽天監自行檢舉依新法改閏九年二月此厯法之不同非  
故避也

人日

正月七日爲人日夫人知之今齊魯諺云一雞二狗三牛四  
猪五馬六羊七人八穀於正月初旬按日測驗以天氣之陰  
晴占物理之盛衰其說固荒誕然亦非盡杜撰也晉議郎董  
勛答問禮俗云正月一日爲雞二日爲狗三日爲猪四日爲  
羊五日爲牛六日爲馬七日爲人八日爲穀宋周必大二老  
堂詩話東方朔占書謂歲後八日一雞二犬三豕四羊五牛  
六馬七人八穀其日晴則所主物育陰則災魏書序亦有一  
雞二狗三猪四羊五牛六馬七人八穀之說三書所載與諺  
語大同小異蓋厯年旣久以譌傳譌遂不無顛倒耳

## 伏臘

伏用庚日臘用戌日劉熙釋名伏者金氣伏藏四氣代謝皆以相生維立秋以金代火金畏火故庚日必伏風俗通臘者所以迎刑送德也大寒至常恐陰勝故以戌日臘戌者溫氣也按伏之名始於秦史記秦德公二年初作伏祠孟康曰六月伏日也周時無至此乃行之臘何自始眾說不同風俗通及蔡邕獨斷皆言夏曰清祀殷曰嘉平周曰蜡漢改爲臘鄭康成月令孟冬臘先祖五祀注臘卽周禮所謂蜡非自漢始先儒以臘祭先祖蜡祭百神二祭各別駁之固是然左氏云虞不臘矣廣雅云夏曰清祀殷曰嘉平周曰大蜡亦曰臘以是觀之鄭氏亦非杜撰此蓋專指臘祭而言至以十二月爲臘月不知何昉史記秦始皇三十一年十二月更名臘曰嘉

平庶乎近之風俗通岱宗廟在博縣西北山虞長守之十月  
日合凍臘月日涸凍正月日解凍唐書永昌元年十一月改  
元載初用周正以十二月爲臘月建寅月爲一月此臘月之  
名見典冊者

邑名取義

郡邑命名或以國如杞曹鄒滕之類或以山川如華陰濟陽  
之類或取吉祥如太平安福之類外此亦必有所取義茲擇  
邑名之生僻者述其由來直隸之南皮漢縣屬渤海郡因章  
武有北皮亭遂名爲南皮江蘇之句容漢縣縣南五十里有  
句曲山其形如句字之曲因以名縣無錫漢縣縣有山舊產  
錫至漢末錫殫因名新莽改曰有錫東漢復舊丹徒秦始皇  
命赭衣人三千鑿山以斷王氣遂名丹徒寶應本漢平安縣

地唐上元中以獲定國寶更爲寶應縣浙江之錢塘九域志  
昔吳郡爲潮水所損州人華信出私錢築塘捍潮因號錢塘  
烏程古防風氏之國戰國爲菰城楚春申君邑秦置烏程縣  
以烏氏程氏善釀得名會稽禹巡天下登茅山會諸侯計功  
因名會稽山秦置郡今降爲縣餘姚秦縣屬會稽郡舜後支  
孫所封地以舜姓姚故以餘姚爲名山西之聞喜漢武帝東  
幸緱氏至左邑之桐鄉聞南越破以爲聞喜縣猗氏古郇國  
地春秋爲晉令狐漢置猗氏縣因猗頓居爲名夏縣漢爲安  
邑縣境後魏別置南安邑縣以其地爲禹舊都更今名河南  
之陳留秦縣臣瓚曰鄭亦有留此留屬陳故曰陳留獲嘉漢  
武帝聞南越破詔以桐鄉爲聞喜復行至汲新中鄉得呂嘉  
首以爲獲嘉縣靈寶本秦函谷關地漢置宏農縣隋改名桃

林唐天寶初得符寶於古函谷關又改曰靈寶盧氏古莘地  
左傳神降於莘卽此漢因盧敖得仙置盧氏縣陝西之咸陽  
山南曰陽水北亦曰陽咸陽城在渭水北九嵎諸山之南因  
名蓋屋音周漢縣元和志山曲曰蓋水曲曰屋甘肅之兩當  
縣杜詩註云地理志鳳州兩當縣以大散關與嘉陵地勢險  
隘相當故名廣東之徐聞漢縣秦以前地名未詳初縣城逼  
近海隅每潮汎洶湧聞者震恐後徙築今城居民喜曰海邊  
潮至庶徐徐聞乎乃更名徐聞縣山西之平陸本唐河北縣  
明皇開天寶河於堅石下得古鐵鐮長三尺上有篆文平陸  
二字遂命改名廣東茂名縣以仙人潘茂名得名晉永嘉閒  
潘仙修鍊於此白日沖舉

州邑古名

秦變封建胥天下爲郡邑經歷代沿革至今州縣仍用春秋  
戰國時城名者寥寥不多見屈指計之猶以山左爲多茲摘  
敘於左泰安府之平陰見春秋傳兗州府之曲阜見禮記陽穀見春秋傳  
沂州府之費見論語莒見史記東昌府之聊城見戰國策高唐見孟子  
青州府之臨淄見戰國策曹州府之范見孟子萊州府之卽墨見史記  
世臨清州之武城見春秋傳至若齊東汶上雖見諸論孟然但泛  
指其地非實有其城故不錄

### 三吳

東吳蘇州中吳潤州西吳湖州

### 八公山

八公山有三同隸安徽境內一在壽州西北二十五里苻堅  
肥水之敗望山上草木皆爲晉兵卽此是若滁州來安縣西



南之八公山乃漢淮南王安與八公憇石處又巢縣西有八公山亦淮南王遇八僊於此因名

釣臺

古人所遺釣臺不一南皮有太公釣臺濮州有莊子釣臺池州西郎山下有梁昭明太子釣臺宜興有任昉釣臺太公之功德尙已莊子昭明任昉亦千古聞人而其臺皆不著獨桐廬江畔巍然高聳者雖婦孺罔或不知其地之顯晦有數與蓋太公等不以釣傳而嚴陵高風則釣之外別無可紀也

五嶺

後漢書吳祐傳注嶺者西自衡山之南東至於海一山之限耳別標名則有五焉廣州記大庾始安臨賀桂陽揭陽是爲五嶺

## 梅嶺

舊唐書東嶠縣卽大庾嶺一名梅嶺史記東越傳樓船將軍楊僕上書願便引兵擊東越上曰士卒勞倦不許罷兵令諸校屯豫章梅嶺待命按梅嶺以漢初梅鎬得名非以梅花得名然庾嶺多梅自古已然荊州記陸凱有折梅逢驛使之句六帖庾嶺梅花南枝已落北枝方開詩話總龜英州司馬植梅三十株大庾嶺自此梅花夾道蓋因嶺上有梅又以梅名嶺好事者往往增置之後人遂以梅嶺爲多梅故云

## 邠邠衛

武王克殷分朝歌之地北爲邠國南爲鄘國東爲衛國三國皆殷紂故都故周興其民後革周衰其風先變後革者六七王之德澤淪浹者深先變者數十祀之腥聞染汚者重按朝

歌卽今之衛輝府

許野關

關在長洲縣西北吳地記本名虎膠唐諱虎吳越諱膠遂改名許墅

鄒滕故國

閻百詩先生少讀孟子至滕定公薨章疑國有大故使人問喪禮於鄒邾往返需時緩不及事及長親歷其地按圖籍訪故老乃知故滕國在今縣西南十五里故邾城在今鄒縣東南二十六里相去僅百里朝發而夕至始恍然於然友之鄒復之之故而歎拘墟者失於孤陋寡聞也於是攷輿圖之遠近山川之修阻郡邑歷代之沿革徵文詢獻撰四書釋地四卷釋地餘論若干篇

## 九成宮

在鳳翔府麟遊縣西五里卽隋仁壽宮唐太宗修以避暑更名九成宮高宗又更名萬年宮後復名九成但九成宮之名不第唐有也宋亦有之宋書徽宗崇寧四年方士魏漢津鑄九鼎成奉安於九成宮帝親幸酌獻

## 函谷關

關城在谷中深險如函故名按函谷關有新舊之分老聃西出孟嘗東歸是爲舊關在靈寶縣南十里望氣雞鳴二臺環列左右遺趾猶存其新關在新安縣東二里項王坑秦降卒處漢樓船將軍楊僕有大功恥爲關外人上書乞以家財東徙關武帝爲移於此

## 熊耳山

禹貢道洛自熊耳按熊耳山起自盧氏縣西境中經陝州盡  
宜陽縣東境故光武破赤眉積甲宜陽城與熊耳山齊又達  
摩葬於熊耳山則在陝州之東其實皆一山也

汶水

漢書地理志泰山郡注汶水出萊蕪之原山西南入沛琅邪  
郡注又云汶水出朱虛之東泰山東至安邱入濰顏師古疑  
之未敢定其說水經注淮南子曰汶出弗其西流合浦高誘  
云弗其山名在朱虛縣按誘說是乃東汶非經所謂入沛者  
也蓋入沛之汶今隸兗州論語之言汶上左氏春秋之言汶  
陽皆指此水東汶今隸青州經史不少概見故鮮知者東汶  
俗呼運河以汶運音相近而譌耳東汶北三四里許有一水  
流稍弱俗呼小運河向不知其何名及見他書有引詩地理

攷者董氏曰出萊蕪者今須城之汶是也出朱虛者今濰之東南有大汶小汶是也始悟小運乃小汶之譌云

### 江河

禹之治水也南條之水江爲大而後世南方之水遂皆名爲江如沅江湘江之類北條之水河爲大而後世北方之水遂皆名爲河如漳河汴河之類詩辭典冊率多用之俗口相沿竟成故實不知古人所謂江河者端指長江大河而言他雖南如淮漢北若渭濟非不浩瀚汪洋第名爲某水而已未嘗以江河名

### 一水六名

京師東南數十里及百餘里巨川環繞襟帶森嚴者爲永定河所謂桑乾水也震宇記桑乾水卽今之盧溝河俗呼曰渾

河亦曰小黃河以源出馬邑縣之桑乾山遂名桑乾河其色黑故曰盧其流濁故曰渾至伏秋大汛時奔騰湧注濁浪排空兩岸設隄防備柴薪修守之具無一不備較黃流實具體而微此小黃河之所以得名焉又名黑河不知於義何取蓋一水而六易其名云或謂無定河亦係此水是不然無定河在陝西延安府青澗縣東六十里卽圖水也

### 辱井

卽景陽井一名臙脂井在上元縣治東北五里舊傳爾有石脈以帛拭之作臙脂痕故名隋兵破臺城陳後主與張麗華孔貴嬪投其中避之後人恥其所爲名曰辱井揚州張詰士詠臙脂詩南朝有井君王辱卽用此典按辱井二字可與貪泉作的對

一百八渡

河名在陝西略陽縣東源出甘肅徽縣下流入嘉陵江渡凡一百八處故名唐許渾詩三十六灣秋月明用以對此可謂天造地設

府州縣同名

幼侍 先君側見有手錄一紙取直省之府州縣重名者詳爲開列當時貪嬉戲未曾留意茲 先君見背已五十年矣偶於仲兄書笈檢得此幅回憶趨庭曷勝悽惻謹書於左以識手澤之存且俾後之志地輿者資考證云新城縣凡四直隸保定府東屬一江西南昌府東屬一浙江太平縣凡四江杭州府西南屬一江西南昌府東屬一浙江太平縣凡四國府南屬一浙江台州府東南屬一山東安縣凡三西平陽府西南屬一四川綏定府東屬一山東安縣凡三一湖南永州府西屬一廣東羅定州東屬龍泉縣凡三浙江處州府西屬一貴州



[illegible]

一	一	東	東	石	凡	南	昌	北	府	縣	廣	東	府	陝	陰	一	一
寧	廣	南	南	門	二	辰	府	府	西	凡	東	武	附	西	縣	湖	江
鄉	東	屬	屬	縣	一	州	東	屬	清	二	惠	定	郭	安	凡	南	西
縣	延	府	府	凡	一	江	屬	一	溪	一	州	府	會	山	二	吉	安
凡	州	興	安	二	湖	南	屬	一	縣	四	陝	東	同	西	一	州	府
二	府	縣	縣	屬	南	衡	鳳	一	凡	川	西	屬	縣	大	浙	西	西
一	湖	凡	二	一	州	州	臺	一	二	龍	興	海	凡	同	江	南	屬
一	南	二	一	新	嘉	南	縣	一	一	安	安	陽	二	府	紹	屬	德
山	屬	廣	江	南	興	屬	凡	貴	四	府	西	縣	廣	一	興	化	縣
汾	長	東	一	一	州	桃	二	州	思	南	屬	凡	東	湖	南	凡	二
州	沙	鄉	廣	江	州	源	一	州	州	屬	二	一	一	南	屬	一	一
府	府	縣	西	西	西	縣	凡	安	府	三	水	廣	山	靖	咸	福	江
西	屬	凡	二	桂	南	二	一	西	屬	縣	凡	東	東	州	寧	建	西
屬	屬	二	一	林	康	一	一	澤	陽	二	州	潮	州	屬	縣	永	九
新	昌	四	江	府	府	一	一	州	府	瀘	一	州	府	海	凡	春	江
昌	縣	川	西	東	西	一	一	江	府	溪	一	府	府	豐	二	州	府
縣	凡	緩	一	北	屬	南	一	蘇	附	縣	一	陝	東	縣	一	西	北
凡	二	定	府	屬	府	常	一	淮	南	凡	一	廣	郭	凡	府	湖	北
二	府	一	江	永	安	河	一	安	屬	二	一	東	石	二	東	武	昌
府	西	江	東	縣	縣	南	一	府	西	一	廣	東	泉	一	南	一	一
屬	瑞	屬	一	凡	二	廣	一	屬	屬	縣	建	江	北	山	一	山	山

升雲南之武定州則由府而降	夢星	按光緒初左爵相督陝	通州直隸有開州貴州亦有開州山東之武定府則由州而	則安徽有太平府廣西亦有太平府順天有通州江蘇亦有	河南南陽府東屬一永福縣凡二一廣西桂林府西南屬府州	隸保定府南屬一永福縣凡二一廣西桂林府西南屬府州	昌府北屬一永福縣凡二一廣西桂林府西南屬府州	一甘肅華昌化縣凡二一廣西桂林府西南屬府州	屬永定縣凡二一廣西桂林府西南屬府州	二一廣西桂林府西南屬府州	嘉州東屬一廣西桂林府西南屬府州	州東屬一廣西桂林府西南屬府州	屬西北石城縣凡二一廣西桂林府西南屬府州	西二貴州都勻府東屬一廣西桂林府西南屬府州	凡二貴州都勻府東屬一廣西桂林府西南屬府州	西二貴州都勻府東屬一廣西桂林府西南屬府州	德府東屬一廣西桂林府西南屬府州	府東屬一廣西桂林府西南屬府州	江蘇東屬一廣西桂林府西南屬府州
--------------	----	-----------	-------------------------	-------------------------	--------------------------	-------------------------	-----------------------	----------------------	-------------------	--------------	-----------------	----------------	---------------------	----------------------	----------------------	----------------------	-----------------	----------------	-----------------

甘時升固原州爲直隸州新設屬縣二曰平遠曰海城按盛京奉天府屬原有海城縣廣東嘉應州屬亦有平遠縣

平定張逆賀表

道光六年六月西域逆回張格爾入卡滋擾陷喀什噶爾英吉沙爾葉爾羌和闐四城勢猖甚 詔授大學士伊犁將軍長齡爲揚威將軍陝甘總督楊遇春山東巡撫武隆阿爲參贊督軍進討七年四五月間列城先後克復而渠魁至年終始就擒八年正月賀表到京累累千餘言取材富有敘事詳明辭藻對仗之工猶其餘事讀之仰見 聖朝武功之盛

宣廟宸算之精以及將帥和衷士卒用命平定張逆之始末可得其梗概云故全錄於左 臣長齡楊芳武隆阿誠端蘇清阿跪奏爲首逆就俘回疆底定恭中賀悃仰蒙 聖鑒

事伏聞七德遐宣迴鑿鐘鼓五材並用爰製干戈有文治必  
兼武功討叛原非動遠繼顯謨而昭承烈安邊卽以衛民奮  
庸揚神武之威唱凱送昇平之喜欽惟我 皇上德煥動

華天錫智勇績

列祖

列宗之鴻緒壹戎衣而嚴輜

肅清咸來王來享以駿奔率職貢而華夷誓服固已道洽重  
熙光被四表矣迺有逆裔張格爾者襲瑪哈墨特之餘氛妄  
生逆焰以阿拉巴圖之賤族狡啟戎心謂天蓋高或緩雷霆  
之擊據地以叛遂生鬼蜮之謀招搖月竈之機槍煽惑花門  
之種類庚郵籤斷莎車之四鎮咸驚戍校屯虛疏勒之孤軍  
遂困箕尾壯山河之氣恩重身輕旄頭興風雨之妖孽深惡  
極始乘我師不備肆憑陵而豕突狼奔繼乃同族相戕乘貪  
淫而鯨吞鵠合九嬰扇虐甘外堯天三葉當除難竟湯武自

準噶爾蕩平之後正霍集占叛亂之時鳥績翼而不解依人  
虎出柙而遠思負固我 高宗純皇帝殲渠掃穴柔遠懷  
來爲國家重立藩籬開新疆二萬餘里俾要荒盡登衽席涵  
醲化六十八年逆祖波羅泥都自干叛殛逆父薩木薩克倖  
免孥誅不期未燼之灰乃發潛滋之蔓我 皇上赫然斯  
怒召司馬以蒐兵肅若臨軒射封狼而整旅乘天玉弩直捎  
太白之芒出塞金饒大合飛黃之隊選干城於列鎮萬馬臨  
邊遣侍從之崇班千牛分衛山飛朱鳳盡飄纓仗劍而來江  
繞黑龍咸中壘射聲之彥 命 臣長齡爲揚威將軍 臣楊遇  
春武隆阿參贊軍務吉日維戊詔出甘泉軍令嚴申氣吞瀚  
海繩十全之聖武御丹臺而策授十條揚萬里之天威捧彤  
矢而歡騰萬眾山皆失險崑都崙縱轡而馳河欲斷流渾巴

什投輟竟渡先趨溫宿捷偏師而轉戰如飛徑取楨中由遠  
道而長驅直進非熊非虎勇氣無前如火如荼軍容倍壯赤  
坂慰來蘇之望牛酒爭持白題矜拒藪之雄燿車尙奮威生  
神臂一時之明月齊鸞機響佛郎四面之火雲盡合屢奪狼  
頭之纛拔幟奪旂欲齊熊耳之山斷戈棄甲勢成破竹未弔  
月而捷已逾三散若驚鳥思背城而戰難借一高墉不守爭  
趨堞以先登壯士長歌遂橫矛而竟入燕方巢幕原撫己以  
知危鼠慣跳梁未凌辰而競竄 皇上乃親裁批答載示  
韜鈴照六幕以無遺早炳先幾之鏡計萬全而不爽重頒決  
勝之符揚逐北之旌旂窮搜蛾黨奮征西之金鼓屢拔龍堆  
三受降城盡復黃圖之舊五折衝校爭窮白狄之蹤躡狐羣  
如鷹隼排空度雁磧而驛驢開路銜枚疾進邊月微明拔柵

爭先陣雲忽起僕姑飲羽並穿長萬之筋孤父飛鉤競斷蚩尤之臂附逆者孽由自作旣落距以摧牙懷德者誠有同歸遂連肩而接踵雖窮鱗匿影尙偷延釜底之生而困獸空羣已盡化原中之血驀坡注澗追奔踰百萬重山涉險絕幽深入又二千餘里什克南輸忱負弩遠縛番酋帕爾西重譯獻琛願爲偵騎時 命楊遇春凱撤入關以 臣楊芳參贊軍務繼又 命 臣武隆阿爲喀什噶爾參贊大臣 臣誠端蘇清阿爲協辦大臣秉 聖訓而策籌善後寓創於因勵戎行而士盡爭先以防爲捕方謂伏林妖鳥永避庭弓詎知被彈驚禽又投天網恃安集延爲牙爪拒比陰螭借布魯特爲腹心噬同疾狗復逞九頭之暴難稽一面之誅於是萬隊之貔貅共奮風鶴皆驚四山之風雨交鳴戈矛齊舉五窮五遁方將買



日爲生六甲六丁倏已自天而下振奇兵而迅擊氣奪先零  
聽飛騎之傳呼生擒頡利此皆我 皇上智周離照徹始  
終而盡有成謨是以各將士吉叶師貞秉方略而聿收洪捷  
大覲覲而小梟斃駢頭嚴後至之誅左干戚而右簫鐃渠首  
就前車之縛兵以不得已而後用故致賊而必生罪至無可  
赦而始誅乃行師而必克抒九地九天之略允迪前光宏善  
繼善述之謨丕揚達孝開九重之闔闔歡傳鳳閣椒花聽萬  
里之鐃歌喜溢鰲山鐙火銀旛彩勝祥光爭耀於紅旂玉燭  
金甌瑞氣常凝於紫陛從此九邊無事將買犢以耕耘萬馬  
不嘶盡解鞍而蹂躪一路唱平羌之曲露布傳郵諸蕃傾向  
日之誠星羅伏地望金牛而北嚮三十六國歡呼有道聖人  
頌天馬之西徠億千萬年慶衍無疆皇祚所有 臣等欣幸忭

舞下忱謹由八百里加緊恭摺馳奏伏祈  
皇上聖鑒謹  
奏

多壽多男

華封三祝一曰壽三曰多男子夫壽與男子固以多爲貴然  
所以祝其多者正惟其多不易有也嘗徵諸鑑史而擇其尤  
於三代後二者各得一人焉北魏太武帝初立以羅結爲侍  
中外都天官總三十六曹事時結年百有七輔政三年乃聽  
歸老朝廷每有大事猶遣騎訪焉家居十年乃卒壽一百二  
十歲大年之人此其僅見者漢書景十三王傳中山靖王勝  
好內有子一百二十餘人螽斯之盛罕與比倫以文考百男  
較之中山反駕乎其上云至道書言漢張陵生於光武建武  
十年至桓帝永壽元年白日昇天年一百二十歲或又云張

道陵於永壽二年九月九日同夫人雍氏登靈台峰白日飛昇時年一百二十三歲說近荒誕不足錄

香山九老辨

新唐書謂白太傅與胡杲吉叟鄭據劉真盧真張渾狄兼謩盧貞謩集皆高年不事者人慕之繪爲九老圖趙雲松辨云香山集自序七老會詩謂胡吉劉鄭盧張六賢皆多年壽余亦次焉在履道坊合成尚齒之會七老相顧以爲希有各賦七言六韻一章以紀之時會昌五年三月二十四日也秘書監狄兼謩河南尹盧真以年未七十雖與會而不及列後序又云其年夏又有二老李元爽僧如滿年貌絕倫亦來斯會續命書姓名年齒寫其形貌附於圖右與前七老題爲九老圖是七老內無狄盧而增元爽如滿爲九老也趙說如此復

引汪立名本詳九人之官位年壽及詩以爲證固確有可據矣乃又附錄宋元豐五年洛陽耆英會云與斯會者年俱七十以上獨司馬溫公年未七十文潞公素重其人用唐九老狄兼謩故事請入會若然則九老中又有狄兩說矛盾而甌北存而不辨者其以兼謩入會見於朱子名臣言行錄惟時新唐書已出朱子本之以立言故不再辨與按溫公入會時年六十四

英俊豪傑

四者皆才德出眾之稱而分析字義則眾說互有異同淮南子泰族訓智過萬人者謂之英千人者謂之俊百人者謂之豪十人者謂之傑詩美如英傳萬人爲英禮記大道之行也與三代之英注倍選曰俊千人曰英大戴禮辨名記千人爲

英素書注傑勝於豪豪勝於俊司馬光四言銘系述于人曰  
俊萬人曰傑北史蘇綽傳千人之秀曰英萬人之英曰傑

草賢

後漢崔瑗善草書王隱謂之草賢說見談苑及王阮亭池北  
偶談此在草聖之前乃人知有草聖而草賢之名不彰其果  
後來居上與

文思武力後不讓前

前明劉定之文學名一時憲宗朝官大學士嘗有中旨命製  
元宵詩內侍卻立以俟據案伸紙立成七絕百首進呈復一  
日草九制筆不停書文思敏捷如此曹子建之七步溫庭筠  
之八叉不得專美於前矣又河南西華人劉通者有膂力縣  
治前石獅重千斤通手舉之因號劉千斤後於成化間糾黨

石龍劉長子等作亂荆襄其人不足道然第以武力論則古人之扛鼎何以加此

韋母傳周官

伏女傳書豔稱千古然伏女不過述其父言輾轉相授非於典謨之奧實有心得也苻秦時韋逞母宋氏家世儒學自幼父授以周官音義謂之曰吾家世學周官傳業相繼吾今無另汝可受之會東晉播遷中原擾亂禮經散佚等諸秦火迨苻堅銳意文教幸太學問經典博士盧壺對曰廢學旣久書傳零落比年綴撰正經粗集惟周官禮經未有其師竊見太常韋逞母宋氏世學家女傳其父業得周官音義今年八十視聽無闕自非此母無可以傳授後生乃就宋氏家置講室書堂生員百二十人隔絳紗帳而受業焉周官學於是復行

於世以此論之宋母之功當在伏女之右乃伏女名婦孺咸知韋母傳經事罕有道及者亦有幸有不幸耳

### 警枕粉盤

吳越王錢鏐自少在軍中夜未嘗寐倦極則就圓木小枕或枕大鈴寐熟輒歛而寤名曰警枕又置粉盤於卧內有所記則書盤中比老不倦其勵精而毋敢暇逸如此試卽警枕一事而推廣焉則大禹之惜寸陰文王之日昃不遑不過如是而粉盤亦古人銘帶書紳遺意其成功詎可量哉惜乎雞鳴孳孳者未必盡爲善而不爲利耳按粉盤記事隋僕射高顯先爲之

### 父子強記

漢武帝行幸河東亡書三篋詔問莫能知惟張安世識之條

錄其事以上後購求得書與安世所錄者相較無一遺失上  
奇其材擢爲尚書令後安世長子千秋與霍禹俱爲中郎將  
隨度遼將軍范明友擊烏桓還謁大將軍光問戰鬪方略山  
川形勢千秋口言兵事畫地成圖應對如流無所忘失光復  
問禹禹不能記曰皆有文書光由是以禹爲不材而賢千秋  
之強記

### 同名字

古今人同名姓字者指不勝屈然或地之相去也若干里或  
世之相後也若而年彼此不相知亦事之常無足異者乃漢  
書杜欽傳欽字子夏茂陵杜鄴亦字子夏俱以材能稱京師  
衣冠無所區別謂欽爲小冠杜子夏而鄴爲大冠杜子夏無  
謂甚矣又成帝時有二王商一爲悼皇后之姪一爲孝元后



之弟同爲國戚一代匡衡爲丞相一代王音爲大司馬同執政權不知當時朝廷宣諭何以別之豈稱其官與抑呼其字與按史記漢高帝時有兩韓信則別之曰韓王信漢書新莽時有兩劉歆則別之曰國師劉歆至同代而不同時者漢有兩張禹一成帝時爲丞相封安昌侯一安帝時爲太尉封安鄉侯晉有兩劉毅一武帝時爲尚書左僕射一與劉裕起義兵討桓元爲豫州刺史唐有兩李光進皆爲名將建節鉞一乃光弼之弟一乃光顏之兄

伏波將軍

馬援爲伏波將軍藉藉人口然古人得此官號者甚多漢書路博德傳以衛尉爲伏波將軍伐破南越三國志魏武破呂布陳登以犄角有功加伏波將軍又平河北夏侯惇以河南

尹遷伏波將軍領尹如故晉書盧欽傳宣帝爲太傅時遷淮  
北都督伏波將軍又葛洪傳太安中石冰作亂洪攻其別率  
破之遷伏波將軍十六國春秋苻秦索泮弟菱任伏波將軍  
惇欽菱無足道若路若陳若葛皆有重名何世之言伏波者  
第謂援耶

### 萬石君

漢石奮高祖時爲中涓少文學而恭謹無與比齊魯質行諸  
儒自以爲弗如也積功官至大中大夫爲九卿徙諸侯相長  
子建次甲次乙次慶皆以馴行孝謹官二千石景帝曰石君  
及四子皆二千石人臣尊寵舉集其門號奮爲萬石君宣帝  
時馮揚爲宏農太守子八人皆二千石號萬石君

### 謝康樂

李太白春夜宴桃李園序吾人詠歌獨慙康樂所謂康樂者  
謝靈運也然康樂之封不自靈運始伊祖元以浚水之捷封  
康樂公劉宋篡位改晉封爵獨置始興廬陵始安長沙康樂  
五公以奉祀故靈運得襲王摩詰詩何異臨州郡還勞康樂  
侯綱目質實亦云宋封謝靈運爲康樂侯易公而侯不知何  
據

陳希元戮鱷

韓文公在潮州爲文驅鱷魚盡徙其族千古快事乃至宋而  
其患復萌宋史陳堯佐傳咸平二年以開封推官言事件旨  
降通判潮州明年夏郡境張氏子年甫十六與其母濯江浹  
倏忽鱷魚尾而食之母號哭弗能救堯佐傷且怒命二吏擎  
小舟操網往捕鱷至暴非可網得至是弭受網乃作文示諸

市而烹之人但知昌黎驅鱷而不知堯佐戮鱷驅猶開網而予以自新戮則執法而罔赦有罪似有循吏能吏之分然鱷既歸化於前復肆虐於後怙終賊刑戮之功正與驅等堯佐字希元閩州人進士及第其戮鱷文列入吳青壇震方嶺南雜記茲不錄

書淫

晉書皇甫謐耽玩典籍忘寢與食時人謂之書淫梁書劉峻好學家貧自課讀書常燎麻炬從夕達旦清河崔慰祖謂之書淫唐書竇威字文蔚好學號爲書淫淫本非佳字然以書淫名則似毀而實譽又竇威傳竇氏子弟皆喜武獨威尙文諸兄詆爲書癡則威之癖書當時有二號矣

善謀善斷

昔唐室之肇造也用房杜爲相定大計決大疑房謀杜斷相業燭然尙已後數百年而又有蹇夏二公二公皆起家洪武時其捐館也在宣德之世厯事五朝位台輔垂三十年聲譽相埒蹇秉銓政厚重質實夏筦度支具有雅量當時朝議推蹇善謀夏善斷有古大臣風烈若四公者洵爲後先媲美云孝宗朝李東陽劉健謝遷同在內閣竭誠盡慮知無不言時人爲之語曰李公謀劉公斷謝公尤侃侃

六君子

明季璫禍起副憲楊公漣僉都左公光斗給諫魏公大中侍御袁公化中僕少周公朝瑞陝西副使顧公大章同被逮先後繫於獄其初被逮也祕獄中忽生黃芝及六人畢入適成六辨或以爲祥顧副使曰芝爲瑞物而辱於此吾輩庸有幸

乎已而果然時以六人爲六君子夫以楊左諸君疾風勁草  
正氣浩然目爲君子洵屬無愧然以君子之名則有先此而  
得之者宋理宗寶祐四年丁大全逐右丞相董槐恣橫用事  
太學生陳宜中黃鑄林則祖曾唯劉黻陳宗上書攻之大全  
怒風言官劾奏六人皆削籍編管遠州士論翕然號宜中等  
爲六君子

漢末兩黃祖

池北偶談云孔融爲北海相左丞黃祖勸結袁曹融怒殺之  
按此事見北海本傳第云有左丞祖者不言姓曰黃祖阮亭  
必別有所據一時有兩黃祖已奇一則殺才人一則爲才人  
所殺恰成對案尤奇

漢書王章傳贊吏民爲之語曰前有趙張後有三王蓋指章及王尊王駿也唐書王方翼傳子珣字伯玉與兄興弟瑁以文學稱時號三王又韓文公滕王閣記竊喜載名其上詞列三王之次有榮遷焉按王勃爲滕王閣序王緒爲賦王仲舒爲修閣記故云玉堂謏語永樂中王洪以總角登第入官翰林與王宜王美齊名都下稱爲三王

三丁三陸

魏晉時雙丁二陸之名嘖嘖人口後千數百年至明季鼎革之際又有三丁三陸其人三丁者仁和丁葑園部郎澎少有雋才與弟景鴻傑並稱三丁吳梅村贈詩有兄弟文章入選樓之句三陸者錢塘陸麗京圻與弟埭培咸以文章經世自任海內稱三陸夫莫爲之前雖美弗彰莫爲之後雖盛不傳

後之丁陸雖未必如儀廩機雲輩名噪當時聲稱後世而填  
篋文望傾動一時亦可謂難兄難弟已况以今視昔其數則  
過與

### 三楊

晉武帝后父楊駿及弟珧濟俱用事權傾中外時人謂之三  
楊唐楊憑善文辭與弟凌凝皆有名大厯中俱擢進士第時  
號三楊明仁宗時楊榮楊溥楊士奇先後入相勳業爛然時  
亦號三楊晉之三楊以權貴稱唐之三楊以文章著明之三  
楊以經濟名權貴無足論文章與經濟輕重固有別矣然雙  
丁二陸兩到三王皆以兄弟得名則後來居上者稍嫌假借  
云

### 小杜



後漢書郭躬傳注前書杜周爲廷尉斷獄深刻小子延年亦明法律故言小杜唐書杜牧傳詩情豪邁人號小杜以別於杜甫又杜審權傳與杜宗俱位將相宗先進故世謂審權爲小杜公今之言小杜者不問而知爲牧之延年審權皆不甚著

遺巾幘

諸葛武侯出祁山與魏相持魏帥司馬懿堅守不出武侯遺以巾幘以羞辱之懿終不戰梁臨川王宏率師禦魏怯不敢戰魏人遺以巾幘隋陳稜討杜伏威伏威率眾拒之稜閉壁不戰伏威遺以婦人之服謂之陳姥宋韓世忠在楚州將士有怯戰者遺以巾幘恥之故人人奮勇武侯事藉藉人口後三事則多有不知者

和靖

宋史林逋傳結廬西湖之孤山三十年足不及城市仁宗賜謚和靖先生又尹焞傳焞以种師道薦召至京師不欲留賜號和靖處士宋蓋有兩和靖一則以肥遯鳴高一則以理學傳世均卓卓人寰者鄭震句云和靖書堂八面開新分半席在山隈卽題尹和靖書院詩也

智囊

史記樗里子傳樗里子滑稽多智秦人號曰智囊又鼂錯傳以其辨得幸太子太子家號曰智囊新莽時魯匡爲義和有權數號曰智囊司馬懿與曹爽相持桓範出赴爽蔣濟言於懿曰智囊往矣是範亦有此號晉杜預亦號智囊見趙素絢雞肋

韓國夫人

唐有二韓國夫人一爲武后姊一爲楊妃姊俱以椒房寵得幸於上前後如出一轍並其封號亦相同楊韓國之事藉藉人口武韓國則鮮有道及者不知高宗早貽厥孫謀立宗特繩其祖武耳

碧玉

喬知之馮翊人唐武后時爲右司郎中有妾曰碧玉武承嗣聞其美奪之知之未能忘情作綠珠怨詩以寄碧玉得詩飲泣三日不食赴井死承嗣得詩於裙帶大怒諷酷吏羅告知之遂被族誅此與石崇孫秀事若合符節且墜樓赴井情既相同碧玉綠珠名更巧對

妾碧玉一作婢窈娘

翟姓兩音

翟字本有二音書羽呋夏翟詩右手秉翟是皆收入錫韻讀作狄國語我先王不窋用失其官而自竄於戎翟之間鹽鐵論鄭之陽翟是皆收入陌韻讀作澤按翟之爲姓也亦然漢書翟方進注翟音狄唐書翟璋注翟音澤

### 海棠作甘棠

蘇文忠公集曰黃州定惠院東小山上有海棠一株特繁茂文忠居黃時攜客置酒賦詩凡五醉其下後與參寥師再訪之則園已易主主雖市井無花竹之愛然以文忠故此樹獨加培植夫培植卽召南勿剪勿伐之意園主知重詞人并因人而及其樹是亦通品未可以市井目之昔羅隱手植海棠於錢塘宋王禹偁有詩題之云江東遺愛在錢塘手植庭花滿院香若使當年居顯位海棠今日是甘棠將末句移贈於

此確切不移蓋詠羅猶是設言詠蘇則爲實事

陳希夷

道德經視之不見名曰夷聽之不聞名曰希宋華山隱士陳搏賜號希夷殆卽取老子不聞不見之意按搏字圖南賜號與名不類老子騎牛出函谷關蕭然物外置理亂於不聞希夷墜驢於華陰喜天下自此定是治忽興衰之故猶惓惓於中也

四產十六子

魏書靈徵志延興中秀容郡婦人一產四男四產凡十六男審是則四乳八子不足奇矣天地之生物不測容有理所必無而事所或有者第存而不論可耳

嫁母受封

寄園寄所寄之勝國遺聞內載有一事云泰和楊文貞公早失怙母陳氏改適德安同知羅子理生京卽大司成璟之祖父後子理謫死遼東文貞年甫十二迎陳及京養之永樂初文貞官內閣陳氏以子貴累贈一品夫人宣德間贈禮部尙書張公鑑卒妻楊氏遺腹生文質字允中卽改嫁允中育於祖母王登正統壬戌進士時繼父已卒乃迎母歸並養其異父之弟妹至成化間楊氏亦以允中官封太夫人嫁母歸受子封前朝固例所不禁與

### 相公

常談叢錄云宋宰輔加封國公則稱相公自明以來乃移以稱諸生其實相公之稱不自宋始韓昌黎寄張使君詩相公親破蔡州回又贈刑部馬侍郎詩暫從相公平小寇且唐人

詩題中如裴相公謫相公令狐相公門下相公等字樣層見疊出是此稱在唐已盛行矣至云今日蘇州人父稱其子京都人稱優伶皆曰相公則違禮不經謬妄甚無謂亦甚

### 下官

漢書賈誼傳坐罷諫不勝任者不曰罷諫曰下官不職按下官之稱六朝最盛故梁唐景宗見高祖且誤稱下官今則爲稗官中語士大夫無道之者矣

### 江伯兒愚孝

明洪武時日照縣民江伯兒母病割脇肉以療弗愈又禱岳嶽祠誓以愈後當殺子祀神旣而母病果愈竟殺其三子山東守臣以聞太祖怒其慘忍滅倫逮伯兒杖之百遣戍海南噫過矣鄉愚不讀詩書安知虧體爲辱親殺子爲非理哉

有倦倦愛母之忱迫切於中雖身與子亦不暇顧殆古所謂愚孝與愚可矜可憫而孝更無可罪司風化者遇此等人不旌表亦不懲創惟諭以虧體殺子國法所禁似於情法兩得其平

### 宮字通用

禮記儒有一畝之宮儀禮母戒女夙夜無違宮事周禮注婦人稱寢曰宮宮者隱蔽之言可見古人貴賤所居皆得爲宮秦漢以後以五聲中宮爲君其爲方也處中央取以名室儼然有君臨天下宅中圖治之意始定爲至尊之居下次不得僭稱矣

### 閼閼

史記功臣侯表古者人臣功有五等明其等曰閼積其功曰



閱漢書田千秋無閎閎功顏師古注曰閎積功也閎經歷也與史記稍有異同至裴子野論晉之用人云降及末世專限閎閎則以閎閎爲世家門第矣

叔姪父子

漢書疏廣疏受傳云父子並爲師傳又云豈如父子相隨出關又云卽日父子俱移病受固廣兄子也而傳中稱謂如此是叔姪直可謂父子更不煩季父猶子之贅語矣

午窗隨筆卷第四

濰縣郭夢星西垣撰

男祐之恭校

從孫恩孚參訂

濰縣志拾遺

夏后杼之五歲征東海伐三壽路史以爲三壽卽平壽濰邑有平壽故城按北海平壽下密濰州俱詳沿革三壽之名縣志不載

慕容皝十四年以東萊北海郡爲育黎縣

郡一作人

宋史建炎二年金帥窩里咄陷濰州金史則云闕母克濰州至如黃天蕩之戰金史謂撻懶在濰州遣移刺古來援而宋史韓世忠傳則謂撻辣使孛堇太一來援二史不同如此然

金史記金事當不至錯誤宋史則傳聞異辭耳

建炎三年九月宋遣直龍圖閣張邵使金邵至濰州見達賚

命邵拜邵曰同爲南北朝從臣無拜禮且具書言兵有曲直

金裂宋地封劉豫曲在金矣達賚怒取所資國書去送邵密

州囚於祚山砦

在安邱縣東北金人置砦於此

建炎四年四月金烏珠欲北歸韓世忠邀擊於江中大破之

達賚自濰州遣貝勒塔葉

宋史作宇堇太乙

拔烏珠塔葉軍江北烏

珠軍江南

宋寧宗嘉定八年金楊安兒作亂敗死其妹四娘子狡悍善

騎射劉全收餘黨奉之稱曰姑姑眾尙萬餘掠食至磨旗山

在濰縣南李全以其眾附之楊氏與私通遂以爲夫

李闖破燕京之後於三月二十四日用僞官九十餘人攻之

又補選牧令等官然皆由吏政府聽選而特授舉人王仕妃爲濰縣縣令賊豈欲甘心於濰耶何獨異於是

王搏晉北海太守後幽州牧王浚謀稱尊號搏等切諫浚殺之

韋熊京兆杜陵人仕苻堅丞相長史爲王猛所器重遂以女妻焉後爲北海太守堅滅奔於江左

劉奉伯本平原人世仕慕容氏父昶從慕容德南渡河因家於北海之都昌縣慕容超嗣僞位奉伯爲東牟令後歸劉裕爲北海太守

劉淵河瑞二年封子乂爲北海王

苻堅時苻重爲北海公又太初三年封其子尙爲北海王慕容儁元璽三年封其弟納爲北海王

建平六年慕容德封其兄子超爲北海王超卽北海王納之子也後德僭號於南燕

逢羨北海人流亡於棘城慕容廆以爲股肱與游邃宋奭皆嘗爲昌黎太守

李之才北海人閭邵雍好學造其廬謂曰子亦聞物理性命之學乎雍對曰幸受教因授以河圖洛書宓義八卦及六十四卦圖象雍旣得其宗旨遇事輒能前知

王氏濰州北海人宋吳奎之母歐陽公有北海郡君王氏墓誌銘

石末瓦硯 六一居士集濰州青州石末皆瓦硯也甚發墨非石硯之比然稍粗者損筆鋒石末本用濰州石前世已記之故唐人惟稱濰州今二州所作皆佳而青州尤擅名於天

下

毅氏棗 太平寰宇記濰州貢毅氏棗按濟南等處有樂氏  
棗相傳樂毅伐齊時攜燕種所植毅氏棗將毋同

明無名氏太公堂詩云西風繫馬太公堂歲月難稽草木荒  
舉首不堪遙望處營邱烏雀在斜陽

崑山顧亭林對亭詩云人臣遇變時亡或逾於死夏祚方中  
微靡奔一人耳二對有遺跡當日兵所起世人不達權但拜  
孤山祀

益都趙秋谷宿寒亭詩云落葉將飛雨鐙前無那聽客衣添  
幾許今夜宿寒亭

襄勤伯鄂旭庭中丞宿寒亭詩云行盡斜陽又見星孤村鐙  
火認寒亭小眠一覺滄桑夢茅店雞聲雪裏聽

阮文達公寒亭詩云五十年下讀遺經淮水橋東馬暫停海  
右無知此間古剎尋亭北有寒亭

掖縣道學博運青登禹王臺詩云千秋明德遠禹廟在高臺  
敬覺神威肅龍蛇畫壁間老松蟠曲徑斷碣卧荒苔遙覽淮  
溜道淮水在東曾乘四載來

劉曰胡滄邑諸生生一子落蓁四顧撫膺垂涕舉家驚怪而  
不忍遽寘溢巷叩其故曰我登州王某前朝進士也今托生  
汝家徒四壁立奈何令召其二子一婿及至共話生平歷歷  
不爽二子伏地大痛又召妾李氏問牀下埋金猶在乎妾言  
取助窺窬矣語畢悲不自勝於是二子分產之半授曰胡兩  
家歲通饋問如戚好焉此事敢尋鄉賢筆中董閬石言聞自  
宋荔裳謂荔裳先生所目擊也

閨闈知兵

小戎詩言婦人勇於赴敵而無所怨然其不怨特不怨君子之于役耳非自能軍也若夫戎馬倥偬之際或躬居前敵或力捍危城或援親於急難或拔人於重圍在鬚眉亦爲矯矯者乃出諸巾幗不難能而可貴乎爰攷古史得若而人焉彙錄於左至所爲非義而履行陳冒矢石其知兵則一也故亦附焉

李秀晉寧州刺史毅女惠帝末寧州歲饑五苓夷强盛圍州城會毅病卒眾以秀明達有父風推領州事秀獎厲士卒嬰城固守糧盡炙鼠拔草而食伺夷稍怠輒出兵掩擊破之荀灌崧女崧於晉愍帝時都督荊州屯宛杜曾圍宛崧兵少食盡欲求援於襄城太守石覽而無能突圍出者灌時年十



三獨率勇士數十人夜踰城且戰且前遂達覽所又爲崧求  
救於豫章太守周訪二處援至曾乃遁去

邵氏晉徐州刺史劉遐妻冀州刺史續女也驍果有父風遐  
嘗爲石季龍所圍邵單將數騎拔退出於萬眾之中遐卒後  
其妹去田防及部伍不樂他屬欲爲亂邵止之不聽乃密起  
火燒甲杖都盡防等遂敗

韓氏晉梁州刺史朱序母序鎮襄陽苻堅將苻丕等圍之韓  
氏登城履行謂西北角當先受弊遂領百餘婢並城中女丁  
於其角築城二十餘丈賊攻西北角果潰眾固守新城丕乃  
引退襄陽謂爲夫人城

洗氏蕭梁高涼太守馮寶妻多籌略善用兵高州刺史李遷  
仕反逼南康陳霸先使周文育擊之洗氏謂寶曰賊精騎與

官軍相拒勢不得還遷仕在州無能爲也君宜遣使倡言輸  
賂蠻人以賂貨爲賂我將千餘人步擔雜物得至柵下破之必矣寶從  
其言遷仕果不設備沈氏襲擊大破之後與霸先晤歸謂寶  
曰陳都督非常人也

孟氏元魏任城王太妃居壽陽任城外出梁將姜慶眞乘虛  
襲之孟氏勒兵登陴激厲文武勸以賞罰將士咸有奮志會  
蕭寶寅兵至合擊慶眞敗走

劉氏元魏梓潼太守苟金龍妻金龍領關城戍主梁兵至金  
龍病不堪部分劉氏帥厲兵民乘城拒戰百有餘日戍副高  
景謀叛劉斬以徇

潘氏元魏楊大眼妻善騎射每逢戰獵潘必戎裝與大眼並  
鏖齊驅還營則同坐幕下大眼每謂人曰此我潘將軍也

毛氏前秦王苻登后登攻姚萇於安定萇留兵守安定而夜帥精騎三萬襲登營克之毛氏美而勇彎弓跨馬帥壯士力戰殺七百餘人衆寡不敵被執萇將納之毛哭且罵爲所殺平陽公主唐高祖女下嫁柴紹大業末高祖起義師紹往赴留主長安主乃散家財招南山亡命得數百人自將以應帝於道平諸劇賊略地至武功勒兵七萬威鎮關中尋會秦王於渭北與紹對置幕府分定京師時號娘子軍

奚氏唐平州刺史鄒保英妻萬歲通天初契丹寇平州城且陷奚率家僮女丁乘城固守賊屢攻不能克詔封誠節夫人高氏唐飛狐令古元應妻默啜攻飛狐高能固守虜引去詔封徇忠縣君

衛州女子侯氏滑州女子唐氏青州女子王氏當史思明叛

時相與插血訂盟赴行營討賊滑漢節度使許叔冀表其忠  
皆補果毅

述律氏契丹主阿保機后勇決多權變行兵禦眾嘗預其謀  
阿保機擊黨項留后守帳室韋乘虛合兵攻掠后偵知勸兵  
以待奮擊破之

梁氏宋贈蘄王韓世忠妻明決有識世忠金山之捷梁親軍  
桴鼓助戰是役也以八千人破金兵十萬軍威大振

繡旗女將金國人不知何氏李全襲東平城乘勝逐北縣出  
谷遇金龍虎上將軍幹不答盛兵以出旁有繡旗女騎馳出  
突鬪全幾不免會救至乃得出

劉氏明左都督山西總兵周遇吉妻素勇健遇吉以五軍遇  
李自成於寧武雖屢破賊鋒而眾寡不敵糧盡援絕自縊

遇吉陣亡劉聞變率婦女數十人升屋擊賊每發一二石斃  
一人賊不敢近四圍縱火焚之

秦良玉明石在宜無使馬千乘之妻萬厯中千乘從征州  
良玉別號秦良玉自隨賊夜襲官營夫婦首擊賊之賊七  
寨直取千本關後千乘死良玉代領其職為人饒膽智善騎  
射兼通詞翰儀度嫺雅而馭下嚴峻戎伍肅然所部皆女  
兵爲遠近所憚奢崇明黨樊龍反重慶以金帛結援良玉斬  
其使已未明圍成都急巡撫朱燮元檄良玉討良玉行而  
西賊遂解圍去良玉還軍攻克二郫并圍南關並獲賊  
授都督僉事充總兵官崇禎三年奉勅助王國宗討賊  
烈帝召見平台賜綵幣羊酒然國宗之十三年恩汝才  
犯夔巫良玉邀之馬家寨斬首六百復追賊於舊城

坪仙寺嶺等處斬其魁東山虎禽其渠副塌天奪汝才大蠹  
賊勢漸衰知州陸遜之奉川撫邵捷春令按營壘良玉語之  
曰邵公不知兵督師以蜀爲壑無愚智皆知不以此時爭山  
奪險令賊無敢卽我而坐以設防此敗道也後果如所言蜀  
陷後良玉分兵守四境賊遍招土司獨無敢至石砭者

霍氏明殉難副使張銓妻也世居沁水縣之寶莊莊有城崇  
禎壬申寇賊貼置子名進進犯時銓已前卒子道濬道澤皆

官京師眾議棄去霍氏曰避賊而出家不保出而遇賊身不  
保等死死於家不愈死於野乎躬率僮僕其守殺賊甚眾賊  
不能克而退翼北道王肇生表曰夫人城

沈雲英隨父至諸任道州守備崇禎十六年張獻忠寇道州  
父出戰已歿賊獲勝會大雨足壘墜燈歿於陣雲英年二十

自帥騎京髮被革直趨賊砦連殺三十餘級奪父屍還城獲全謝撫王上其事詔授雲英爲游擊將軍仍領父眾

楊氏明總兵蕭如薰妻尚書兆女也萬厯壬辰如薰時爲參將守平魯值巴拜作亂陷玉泉營及廣武河西四十七堡遣其黨土文秀徇平魯楊氏盡出簪珥勞軍士妻帥之守城賊攻圍數月竟不能克

呂母新莽時瑯邪女子因子爲宰所寃殺乃散家財買兵弩陰結貧窮少年得百餘人攻海曲縣殺宰以祭子墓遂引兵入海其眾浸至萬數

遲昭平平原女子新莽地皇二年聚數千人在河阻中爲亂徵側徵貳交趾女子俱雄勇後漢建武十六年交趾太守蘇定繩以法徵側怒與妹徵貳反九真日南合浦蠻俚皆應之

凡略六十五城自立爲王十九年伏波將軍馬援討平之  
陳碩真睦州女子唐永徽中聚衆爲亂陷睦歙二州爲婺州  
刺史崔義元所破碩真伏誅

楊四娘子益都賊楊安兒之妹狡悍善騎射安兒敗死楊氏  
收其餘衆尙萬餘北海李全以其衆附之遂以爲夫全仕宋  
忽降忽叛後爲趙范等所敗走死新塘楊氏慨然曰二十年  
梨花槍天下無敵手今乃至此走山東與其黨國用安降蒙  
古用安復降金楊氏怒屠用安家走益都後死於山東

唐賽兒蒲臺縣民林三妻以幻術聚衆自稱佛母得石函中  
寶書神劍據益都卸石柵爲亂攻陷莒卽墨圍安邱明成祖  
遣安遠侯柳升都指揮劉忠勦之賽兒詭降夜襲官軍射殺  
忠後爲衛青王眞所敗衆遂潰賽兒遁去不知所終



紅娘子河南繩伎因亂亦聚眾反擄杞縣舉人李信強委身焉信逃歸郡縣以爲賊收下獄紅娘子劫出之橫行河洛間爲明季流賊之一

伯僚

史記伯夷列傳於讓國事第三云國人立其中子不著名烈士傳云伯夷讓叔齊叔齊不立乃讓於異母弟伯僚是伯僚卽史記所謂中子矣其說殊不足信旣曰弟又曰中子則雁行當在夷齊之間曰仲僚卽或有嫡庶之分而嫡長稱伯庶長稱孟亦不應以伯名達迺係學生故皆曰伯旣異母則非孿生可知

羊馬城

唐李光弼河陽之捷使李抱玉守南城自將屯于羊馬城

遣周摯攻之光弼令荔非元禮拒戰羊馬城胡三省曰城外更築短垣謂之羊馬城今城下池上有築土爲牆高可蔽人謂之牛馬牆者大約卽羊馬城之譌

### 猶豫

顏師古曰猶獸名爾雅曰猶如麕善登木此獸性多疑慮居山中每聞有聲卽恐有人害之豫上樹潛避久之無人然後敢下須臾又上如此非一故優柔寡斷者謂之猶豫離騷云心猶豫而狐疑蒯通傳猛虎之猶與不如蠡蠆之致蠱孟賁之狐疑不如童子之必至劉向傳決斷狐疑分別猶豫以猶豫對狐疑古人往往用之

### 侵牟

侵吞肥己謂之侵牟二字出漢書李奇注云牟食苗根蟲也

侵牟食民比之蜂賊而已

### 洞房閨闈

子虛賦云巖突洞房顏師古以爲於岩穴底爲室若竈突然賦又云奔星更於閨闈顏師古以爲宮中小門今所謂洞房則專指新婚之室所謂閨闈則專指女子所居矣

### 家弟

世說戴安道既歸操東山而其兄欲建式遏之功謝太傅曰卿兄弟志業同其太殊戴曰下官不堪其憂家弟不改其樂南齊蕭毅飲藥且死曰家弟在雍深爲朝廷憂之陳文帝謂杜杲曰家弟今蒙禮遣實周朝之惠唐溫大雅改葬祖父卜人占其地曰害兄而福弟大雅曰若家弟永康我將含笑入地家弟之稱屢見史冊並非不典近時名人如王阮亭居易

錄載有門人汪子鼎寄書一則末云敢因家弟孝廉澐公車之便再申前請袁簡齋隨園詩話有家弟春圃觀察語歷城朱式魯曾傳乾隆丙子孝廉亦有示家弟無咎詩而今則用者寥寥矣

果下牛

述異記曰南郡出果下牛高三尺果下馬人恆知之果下牛之名未聞人言及

無賴

漢文帝登虎圈問上林尉禽獸簿十餘問不能對虎圈嗇夫從旁代對嚮應無窮帝曰吏不當如此耶尉亡賴夫亡賴第言其不材耳而今所謂無賴者則指好勇鬪狠鑽穴踰牆廉恥全無之人矣

蘭絲保障

國語趙簡子使尹鐸爲晉陽請曰以爲蘭絲乎抑爲保障乎  
簡子曰保障哉按蘭絲謂駸民之膏如抽蘭絲保障謂捍民  
之忠如築堡白保必如此解本文抑字哉字語氣方合乃今  
人行文往往並舉混用泛作循良政績話頭殊爲習而不察  
羊溝

莊子羊溝之雞三歲爲株注羊溝關雞處崔豹古今注長安  
御溝一曰楊溝謂植楊於上也又曰羊溝因羊喜抵觸故爲  
溝以限之今齊魯閒於牆下留隙洩水之處謂之羊溝則存  
其名而失其義矣

瑟瑟

博雅云瑟瑟碧珠也杜工部詩雨多往往得瑟瑟注益州城

西每雨過人多得瑟瑟杜陽雜編元載屏風以玳瑁水犀爲押又絡以眞珠瑟瑟明皇雜錄華清湯池中壘瑟瑟及沈香爲山又云號國中堂旣成以金盞瑟瑟三斗爲賞舊唐書高仙芝性貪獲石國大瑟瑟十餘石五代史四夷附錄吐蕃婦人辮髮戴瑟瑟其佳者每顆易一良馬

### 內子

左傳趙姬請迎盾與其母來以盾爲才以爲適子而使其三子下之以叔隗爲內子而已下之注卿之嫡妻爲內子玩注意非卿嫡則不得稱可知今有一命之榮者亦多自稱其妻爲內子若爲謙辭不知僭己甚矣

### 十常八九

晉武帝時吳主孫皓淫虐日甚羊祜勸乘機伐之賈充荀勗

等持以爲不可祗歎曰天下不如意事十常居七八黃山谷有句云人生不如意十事常八九其卽用此典而故甚其辭與抑別有所本與

挑蟲

禮月令篇有其蟲羽其蟲毛句知凡物之非蟲類者皆可以蟲名之然命名必有所取義如雉曰華蟲以其文明也鷹曰剛蟲見張衡賦以其搏擊也馬與鼃曰鼃蟲見淮南子以其蠢愚無知也至周頌名鷦鷯爲挑蟲不知義於何取

自伐

虞書云汝惟不伐論語云願無伐善又云孟之反不伐伐者自矜其功之謂與伐木之伐同義言凡人矜誇自己之能乃所以自戕其能如伐木然老子云不自伐故有功莊子云六

篇吾聞之大成之人曰自伐者無功

宦字通用

曲禮宦學事師非禮不親服虔曰宦亦學也學職事爲官也  
左傳宣二年宦三年矣注與服說同是宦字可當學字解耳  
至僖十七年子圉西質妾爲宦女焉則近於宦官官妾之謂  
與此宦字不同

釋道所居

秦漢而降至尊所居始謂之宮宮前有闕中華古今注云闕  
者觀也古每門樹兩觀於其前所以標表宮門也登之則可  
遠觀故謂之觀寺亦爲官解之名非私室所敢妄擬乃浮屠  
所居亦謂之寺道士所居則曰宮曰觀是緇衣得升卿貳之  
堂黃冠得入天子之室道更尊於釋矣何無分別如是



桑落酒

蒲城桑落酒。蒲岸菊花秋。庾信就蒲州刺史乞酒詩也。水經蒲阪下注。郡民有劉白墮工釀。採挹河流醞成。芳酎熟於桑落時。故酒名焉。據此則桑落酒實出蒲中。而西羌桑落河出馬乳。墮羌人釀葡萄壓之。晉宣帝時嘗來獻。似葡萄酒亦名桑落云。

成語

今人以古人言爲成語。而古人亦慣用成語。輾轉相謂。幾不知語所從出。摘錄數言以備觀覽。庶不至數典而忘其祖。如狡兔死走狗烹。高鳥盡良弓藏。韓信謂漢高祖語也。而范蠡遺文種書。早曰蜚鳥盡良弓藏。狡兔死走狗烹。人苦無足言。得隴復望蜀。曹操答司馬懿語也。而光武賜岑彭書。早曰人

苦不知足既平隴復望蜀豺狼當道安問狐狸張綱之目梁  
冀也而先見於漢書孫寶傳鷙鳥累百不如一鶚孔融之薦  
彌衡也而先見於漢書鄒陽傳唐明皇謀誅武韋曰事成歸  
王事敗不忍累王語本於貫高等之事成歸王事敗獨身坐  
耳漢吕后彊食張良曰人生一世如白駒之過隙語本乎魏  
王豹之人生一世閒如白駒過隙右軍蘭亭序曰後之視今  
猶今之視昔京房對元帝已曰後之視今猶今之視前國策  
趙良說商君曰千羊之皮不如一狐之腋國語趙簡子語諸  
大夫亦曰千羊之皮不如一狐之腋老當益壯窮且益堅王  
勃滕王閣序有此二語後漢書馬援謂賓客曰丈夫爲志窮  
當益堅老當益壯

宮怨詩

唐人作宮怨等題者甚多異曲同工各臻其妙王少伯更以此擅長然精益求精則莫如李太白之玉階怨云玉階生白露夜久侵羅襪卻下水晶簾玲瓏望秋月其望幸不得見之意含蓄不露全於言外傳神詞婉而和深得詩人溫柔敦厚之旨允推上選至少伯之玉顏不及寒鴉色猶帶昭陽日影來非不新警細味之與自恨身輕不如燕春來還繞玉簾飛之句同一格調怨而近與怒矣

### 郎君

叔父朱門貴郎君玉樹高杜工部題柏八兄弟山居詩也注云古稱貴人之子及當事其父者爲郎君又云柏八兄弟當是柏貞節之子姪李義山題令狐綯廳事詩郎君官貴施行馬東閣無因得再窺蓋義山爲令狐楚從事楚卒子綯繼有

韋平之拜惡其從鄭亞之辟疏之故義山於九日留詩云云  
三國志蜀漢張疑與諸葛瞻書曰太傅諸葛恪受寄托之重乃  
欲離少主履敵庭恐非良計長算之術自非郎君進忠言誰  
復有言者瞻父爲武侯疑實身親事之

### 靈壽杖

漢書孔光傳注靈壽木名似竹有枝節長不過八九尺圍三  
四寸自然有合杖制不煩削治也靈壽木見蜀都賦水經注  
亦云巴鄉村側有谿谿中多靈壽木據二說則此木當產於  
川省

### 人給家足

家給人足成語也其原出於史記商君傳及漢書東方朔非  
有先生論貢禹奏漢元帝言而史記平準書云漢興七十餘

年之間國家無事非遇水旱之災民則人給家足漢書司馬遷傳亦有則人給家足之道語夫給亦謂足本無區別若論其出處則史漢皆兩用之乃今人行文習用家給人足而用人給家足者恆鮮不第今爲然也晉書武帝紀論於時民和俗靜家給人足說苑令百姓家給人足鄧析子家給人足天下太平也蓋相沿已久

#### 四時八節

諺有云四時八節四時謂春夏秋冬八節則不知何指杜工部贈兄詩四時八節還拘禮女拜弟妻男拜弟幼讀之以爲涉俗而於八節二字終屬懸疑也後聞出自周髀算經注云二至者寒暑之極二分者陰陽之和四立者生長收藏之始是謂八節庾子山詩八節管絃遊李義山詩四時當首夏八

節應條風古人蓋嘗用之

清盧

盧字有數解書作國名詩言田犬說文爲飯器一曰賣酒區又水黑色如桑乾河亦名盧溝又姓自漢以後名人甚多凡此數端皆人所習知獨甘泉賦云玉女無所眺其清盧兮服虔注盧目童子也此解未經人道

蒲公英

蒲公英草花也可入藥本草蒲公英庚辛玉冊作鵝鵠英俗呼蒲公英又呼黃花地丁一物本有四名今齊魯閒呼作娑婆丁是英既譌爲丁而蒲公英二字又復皆譌與本名無一字合矣

三爵

爵鳥名說文飲器象爵者取其鳴節節足足也字彙取其能飛而不溺於酒以示儆焉以爵名飲器自有深意詩云三爵不識別敢多又禮云三爵而油油以退左云臣侍君宴過三爵非禮也可見古人飲酒以三爵爲度無敢或過今之卜晝卜夜樂酒無厭而欣欣然自矜其量之大者不知何所取法矣

女子有家

自外到家曰歸桃夭詩之子于歸宜其家人朱子注云婦人謂嫁曰歸蓋言以夫家爲家也乃其省父母也則曰歸寧其被出也則曰大歸又似以母家爲家然則婦人有兩家矣孟子云女子生而願爲之有家究以夫家爲家者近是

俗傳中國之有薏苡由馬援自交趾攜來其說未確吳越春秋云鯀娶有莘氏女曰女嬃嬃於砥山得薏苡吞之意若爲人所感因而妊孕剖脅產禹帝王世紀載鯀妻修己吞神珠薏苡胸拆而生禹論衡亦曰禹母吞薏苡而生禹三說雖稍有異同而吞薏苡則一是薏苡自古已有非始於援明矣按後漢書援在交趾常餌薏苡用能輕身省慾以勝瘴氣南方薏苡實大援欲以爲種軍還載之一車後遂有明珠文犀之謗玩史言則援所留遺特其實大者耳

一字一義

古人行文一字一義無重複者如宇宙兩聞也釋名天地四方曰宇往古來今日宙姓氏定宗族也趙彥衛雲麓漫鈔姓者所以統系百世使不別氏者所以別子孫所自出僚窠同



午窗隨筆卷第四

六

寅也爾雅注同地爲采同官爲僚昏嫻兒女親也字林昏婦家嫻婿家媒妁冰人也說文媒謀也謀合二姓使成親也妁酌也斟酌二姓以合配偶也窈窕婦人美稱也揚子雲輶軒絕代語美心爲窈言幽靜美狀爲窕言閑都擯相贊禮人也周禮大宗伯注出迎賓曰擯入詔禮曰相職獲賤稱也輶軒絕代語淮海閒罵奴曰賊婢曰獲跬步緩行也管子司馬法曰一舉足曰跬跬三尺兩舉足曰步步六尺寇賊盜也書舜典傳劫人曰寇殺人曰賊饕餮謂貪也左文公十八年注貪財曰饕貪食曰餮貨賄財物也鄭康成云金玉曰貨布帛曰賄倉庾儲粟所也史記文帝紀注在邑曰倉在野曰庾又說文倉無屋曰庾闔閭市廛也中華古今注闔者市牆闔者市門庖廚造膳處也禮記解義宰殺之所曰庖烹飪之所曰廚

綱紀條理也詩大雅傳凡綱瓘張之爲綱理之爲紀經緯縱橫道路也周禮天官冢宰疏南北之道謂之經東西之道謂之緯其外類乎此者不可枚舉今皆渾而言之無復區別學者讀書不求深解其弊往往如此

### 堪輿

淮南子堪輿行雄以知雌許慎注堪天道也輿地道也甘泉賦屬堪輿以壁壘兮張晏以爲堪輿天地總名孟康曰堪輿神名造圖宅書者顏師古注漢書取張說爲是堪輿眩言天地許顏二說並同何今所謂精於堪輿者專指地師而言耶

### 阡陌

阡陌田閒道路也阡陌爲言千百周禮遂人夫閒有遂遂上有徑又云百夫有洫洫上有涂徑爲百畝涂爲百夫此陌字

之取義十夫有溝溝上有畛又云千夫有澮澮上有道畛爲千畝道爲千夫此阡字之取義史記秦本紀注風俗通曰南北曰阡東西曰陌河東以東西爲阡南北爲陌二說不同朱子以後說爲正然說文亦云路南北爲阡究不知當何從

蠶叢

揚雄蜀王本紀蜀王之先名蠶叢柏灌蒲澤開明魚鳧是時人民椎髻龐言不曉文字是蠶叢爲蜀之先王名太白詩見說蠶叢路崎嶇不易行蓋言蠶叢所闢之路崎嶇不平非卽以蠶叢爲崎嶇也觀其另句云蠶叢及魚鳧開國何茫然可見今人作詩有以蠶叢爲道對用者誤

胡麻飯

幽明錄漢永平中劉晨阮肇采藥失故道行至溪許二女迎

歸食以胡麻飯求去指示之至家已歷七世唐姚合詩不喫胡麻飯杯中自得仙幾疑胡麻爲仙家之物非尋常所能有矣夢溪筆談曰胡麻卽今油麻更無他說其角有六棱者有八棱者張騫自大宛得油麻種故以胡別之而以中國麻爲大麻按通鑑晉桓元攻殷仲堪江陵乏食以胡麻廩軍其非異物可知

### 落拓

北史楊素少落拓有大志不拘小節唐杜牧詩落拓江湖載酒行來鵬詩自嗟落拓無成事落拓者不得志之謂也一作落度華陽國志楊儀自以年宦在蔣琬前而處琬下謂費禕曰公亡後吾舉衆降魏處世寧當落度如此耶又作拓落楊子雲解嘲文云意者元得毋尙白乎何爲官之拓落也顏師

古釋拓落爲不耦是亦與落拓同意

殿

殿之名三代以前不見史記秦始皇本紀始作前殿此殿名之權輿按正韻堂高大者曰殿初學記倉頡篇殿大堂也漢黃霸傳令郡國上計吏有舉孝子弟弟貞婦者先上殿注云丞相所坐屋古者屋之高嚴通呼爲殿不必宮中今則惟天子宸居始得稱之他不得僭

訓誨

訓誨皆教也古本上下通用無所區別如伊訓乃明言列祖之成德以訓于王是伊尹訓太甲也高宗彤日乃訓于王曰是祖己訓武丁也論語忠焉能勿誨乎左傳大夫規誨亦皆言以臣誨君今則定爲以上示下之詞下不得用於上矣

## 丈人丈母

宋史王質通判蘇州州守黃宗旦少質嘗因爭事宗旦曰少年乃與丈人抗耶唐鎮海節度使韓滉與汴梁節度劉元佐約爲兄弟入朝過汴請拜劉母因勸元佐曰弟宜早入朝丈母垂白不可使帥諸婦女往填宮也丈人丈母蓋男女長年之通稱至謂外舅爲丈人外姑爲丈母則本於柳子厚文

## 儒字混用

通天地人曰儒論語女爲君子儒無爲小人儒禮記儒有席上之珍以待聘又不敢以儒爲戲儒本土人之號非他途所得假借乃亦有不盡然者漢書匈奴傳論縉紳之儒則守和親是仕宦亦可稱儒矣又司馬相如傳相如以爲列仙之儒居山澤閒形容甚懼是仙佛亦得謂儒矣

先生稱名

凡稱人爲先生或舉其字或舉其別號比比皆是閒有以地稱者如南郭先生用里先生梧下先生又或因其所業而稱之如齊書沈麟士號織簾先生洞冥記李克號負圖先生等類若呼其名而稱爲先生則人咸笑之謂敬肆之不倫也然戰國策鞠武曰燕有田光先生者則此稱自昔已有之

使功不如使過

太原閻百詩先生經術湛深長於考據徐健庵尚書深加敬禮每作詩文必屬其點定一日在徐邸夜飲尚書言古有使功不如使過語不知出於何書先生對以宋陳良時有此題論篇中言秦伯用孟明事而於出處亦無以應越十五年讀唐書李靖傳高祖以靖逗留詔斬靖許紹爲請免後率兵破

開州蠻帝謂左右曰使功不如使過果然矣謂監觴端在於  
是又越五年讀後漢書獨行傳索盧放諫更始使者勿斬太  
守曰夫使功者不如使過章懷太子注若秦穆公赦孟明而  
用之乃恍然於良時之文所由來此事先生與及門嘗言及  
之夫以先生之博雅於此一典猶必俟二十年而後知甚矣  
學問一途浩如淵海雖讀書萬卷而挂漏者不知凡幾

### 八分非隸書

郭忠恕佩觿八分書者八分篆法二分隸文法書苑書有八  
體蔡邕於八體之外又分此法故云八分八體者一曰大篆  
二曰小篆三曰刻符四曰蟲書五曰摹印六曰署書七曰殳  
書八曰隸書見說文隸自隸八分自八分謂八分書卽隸書  
者誤



秣卽糯米

詩周頌豐年多黍多稌注稌稻也爾雅翼稻爲漑種之總名  
稌爲何稻詩注未嘗析言之李元復常談叢錄云稻穀之黏  
者名糯卽詩所謂稌種類不一有紅穀糯米穀灰紅色陸穀糯  
米形稍長飽如米白則爲棉花糯米短則爲麥子糯米長則  
爲柳條糯吾鄉地高燥宜黍不宜稻米商閒有自諸城膠州  
販運者亦皆旱田所藝鄉人謂之大米蓋別乎粟米而言也  
性黏者則名糯米色皆純白其色紅者別名香稻香稻亦有  
二種色深紅而性不黏者爲香稻大米紅色淡而性微黏者  
爲香稻糯米

沙用鳩

呂氏春秋凡水用舟陸用車塗用輶沙用鳩山用櫟因其勢

也虞書但言予乘四載傳以舟車輶櫟釋之而不及鳩

力鈞勢敵

今謂權位等夷兩不相下者曰勢鈞力敵語出於逸周書史記解本作力鈞勢敵其文云昔有南氏有二臣貴寵力鈞勢敵競進爭權

好漢

好漢二字說部中習用人遂以俗語目之而實非杜撰也舊唐書狄仁傑傳則天嘗問仁傑朕要一好漢任使有乎仁傑曰荊州長史張柬之其人雖老真宰相才此二字之見於史冊者東坡詩人間一好漢誰似張長史放翁詩似我猶爲一好漢問君曾見幾聞人此二字之形諸歌詠者坡詩蓋卽用梁公薦賢事

豆腐湯

今人言不中肯而長言不已滿座厭聞者諺謂之豆腐湯蓋  
譏其無味也湯文正公廡吳時薄於自奉日取野薺和豆羹  
以食民間遂以諺語豆腐湯名之其語頗近輕薄第思儉可  
養廉吳俗奢華相尚其飲食之豪縱奚啻日費萬錢公躬行  
節儉不惟於一己願廉隅並可於一方移風俗則豆腐湯之  
名又烏可少哉世有以毀爲譽者此類是也

束蒲爲脯

風俗通秦相趙高指鹿爲馬束蒲爲脯二世不覺困學紀聞  
指鹿爲馬束蒲爲脯可以欺二世而不能欺子嬰潘岳西征  
賦野薺變而爲脯苑鹿化以爲馬亦借高事而兩用之何指  
鹿爲馬人人解道蒲脯事則鮮有知者古今注云秦二世時

丞相趙高用事乃先獻蒲脯

鼎碣僞造

後五代張策幼聰悟嗜學居洛陽敦化里父同浚井得古鼎銘曰魏黃初元年春二月匠吉平同以爲奇策時年十三侍父側啟曰漢建安二十五年二月改元延康至十月魏文帝受禪又改黃初是黃初元年無二月也銘何謬蜀碧及廿一史約編言成都東門外有鎮江橋橋畔有迴瀾塔萬厯中布政余一龍修張獻忠竊據蜀惡塔之窺見城內也毀之掘地得一古碑篆云修塔余一龍拆塔張獻忠歲逢甲乙丙此地血流紅妖運終川北毒氛播川東吹簫不用竹一箭貫常胸漢炎興元年諸葛孔明記按炎興元年太歲在癸未是爲蜀亡之歲而武侯卒於建興十二年甲寅至癸未武侯已前卒

午窗隨筆卷第四

三

二十九年矣荒誕謬妄其爲僞造無疑然二者皆因年歲參差自相矛盾故人知其僞外此而無隙可指者正不知凡幾嗜金石諸公尙其辨諸

紙筆濫觴

紙筆居文珍之半而推原所自筆則造於蒙恬紙則造於蔡倫恬爲秦將長槍大劍與毛錐子判然兩途倫爲漢和帝時中常侍刑餘之人士林羞稱最下腐刑極矣二人之臭味與文人學士固冰炭不相入也乃所造之物千載下文人學士莫不珍重而愛惜之須臾不可離雖小道必有可觀者焉殆此之謂乎

儀狄造酒

孟子趙岐注云儀狄始造酒禹飲而甘之遂疏儀狄而惡旨

酒後世議之者曰禮記王制篇有虞氏養老以燕禮又明堂位泰有虞氏之尊也酒不始於儀狄可知然趙說本諸戰國策非杜撰國策在秦火之前去古未遠簡策流傳必有所據且九經莫古於尚書甘酒嗜音酒荒于厥邑沈亂于酒等句皆出於夏書夏以前未有酒之名也禮記雜出漢儒之手其說亦未可拘泥

### 諸葛鼓鍋

明萬厯元年四川總兵劉顯邦成奉巡撫曾省吾令討都掌蠻擒其酋阿大阿二方三是役也凡克寨六十餘得銅鼓九十三銅鐵鍋各一阿大泣曰鼓聲宏者可易千牛次者七八百得鼓二三便可稱王鼓山巔羣蠻畢集今已矣鍋狀如鼎大可函牛鏤畫有文彩相傳諸葛武侯征蠻時設鼓以鎮之

鼓失則蚤運終矣

守宮九名

博物志蜥蜴或名蜥蜴以器養之食以朱砂滿七斤體盡赤搗萬杵點文人支體終身不滅耦則落故號守宮爾雅疏云蝶蜥蜥蜴蜥蜴守宮一物相類而四名也在草澤中者名蝶蜥蜥蜴在壁名蜥蜴守宮又引方言云秦晉西夏謂之守宮或謂之蠱蠱南楚謂之蛇醫或謂之蝶蜥蜴軒絕代語又有刺易號蜥之稱是四名之外復有蠱蠱蛇醫刺易號蜥四名不第此也本草守宮食蠱故呼蜥虎東坡詩有窗閒守宮稱蜥虎句蓋一物而九易其名矣

緣木求魚

池北偶談云本草陶注鰻鱺魚能緣樹食藤花雜俎鰻魚能

上樹贊曰有足若鯢大首長尾其嘯如嬰緣木弗墜宋祁方物略曰魴魚出西山溪谷及雅江狀似鯢有足能緣木三引書其說略同審是則緣木求魚信可以得魚矣

### 主簿蟲

江南舊無蝎唐開元初一主簿以竹筒盛過江始有之俗呼爲主簿蟲

### 鑿齒

漢書揚雄傳昔有彊秦封豕其土竅窳其民鑿齒之徒相與摩牙而爭之應劭曰淮南子云堯之時竅窳封豨鑿齒皆爲民害服虔曰鑿齒長五寸似鑿食人

### 佛書

宋許觀東齋記事謂佛書之見於中國不始於漢明帝時歷



引劉向列仙傳得仙者百四十六人其七十四人已在佛經  
霍去病傳收休屠登天金人漢武故事曰昆邪王殺休屠王  
以其眾來降得其金人之神置之甘泉宮金人皆長丈餘其  
祭不用牛羊惟燒香禮拜魚豢魏略西夷傳曰哀帝元壽元  
年博士弟子景盧受大月氏王使伊存口傳休屠經皆在明  
帝之前爲證考據詳明是已惟又引隋書經籍志云其書久  
已流布遭秦之世所以湮滅是蓋謂秦火之前已有佛書也  
其說殊不足信秦以前爲戰國爲春秋使其時佛書若入中  
國何以三傳國策論孟諸書並無一語及之孟子闢異端不  
遺餘力其所謂正人心息邪說者但言距楊墨未聞闢佛書

先君子生平讀書不喜近名每諭小子曰名者實之表實不副而名歸之而孰甚焉又云古之名流抱膝長吟若將終身其意量固已深遠矣若稍有一得輒欲自炫于世則所學恐無所成以故遺書數種生前從未出以示人今梓人告成而先君子之墓木已拱矣敬綴數語聊以誌遺訓云爾乙未夏日男祐之謹跋